

# RREGULLORE PER LIDHJET E REJA NË RRJET PËR SEKTORIN E GAZIT NATYROR

## PJESAI: TË PËRGJITHSHME

### Neni 1.

#### Fusha e veprimit dhe zbatueshmëria e Rregullores

Kjo rregullore përcakton procedurën e aplikimit, kriteret për miratimin dhe realizimin e një *lidhjeje* të re ose modifikimin e një *lidhjeje* ekzistuese dhe përcaktimin e tarifave përkatëse për lidhjen e paisjeve të përdoruesit të rrjetit të transmetimit ose të shpërndarjes në sektorin e gazit natyror (më tej referuar si Rregullorja).

Kategoritë dhe nënkategoritë e *lidhjeve* që janë objekt i kësaj Rregulloreje ose nuk përmbajne asnjë *zgjatje të rrjetit*, ose janë vetëm *zgjatje të vogla të rrjetit* që janë të nevojshme për të furnizuar një përdorues të ri të rrjetit, ose për të modifikuar një *lidhjeje* ekzistuese me një rrjet transmetimi ose shpërndarjeje të gazit natyror, për të cilin kostot përkatëse i ngarkohen drejtpërdrejtë dhe rimbursohen nga *aplikanti*.

Në rast se një aplikim për një *lidhjeje* kualifikohet si pjesë e planit vjetor të investimeve të Operatorit të Sistemit (OS) ose e planit dhjetëvjeçar të zhvillimit të rrjetit të OS (TYNDP<sup>1</sup>), procesi i miratimit do të duhet të ndjekë kërkesat e Nenit 11 të Ligjit Nr.102/2015 "Për Sektorin e Gazit Natyror", i ndryshuar, Vendimit të Këshillit të Ministrave nr. 713 datë 25.8.2010, dhe metodologjisë për vlerësimin e TYNDP të ERE-s dhe çdo legjislacioni tjetër përkatës.

Kjo Rregullore është e zbatueshme për OS në lidhje me sigurimin e *lidhjeve* të gazit për përdoruesit e rrjetit në zonat e tyre të shërbimit dhe rregullon procesin e lidhjes.

### Neni 2.

#### Autoriteti

Kjo Rregullore bazohet në Ligjin nr.102/2015 "Për Sektorin e Gazit Natyror" i ndryshuar, Neni 16, pika 1 dhe pika 18, Neni 11, Neni 32, pika 1, Neni 42, Neni 43, Neni 53, Neni 54, dhe Neni 89.

### Neni 3.

#### Përkufizime<sup>2</sup>

1. Me përjashtim të termave të përcaktuar më poshtë, çdo term, fjalë dhe shprehje e përdorur në të gjithë këtë Rregullore do të ketë të njëjtin kuptim me ato të përcaktuara në Ligjin Nr. 102/2015 "Për Sektorin e Gazit Natyror" i ndryshuar. Shprehje të tjera të përdorura në këtë Rregullore kanë kuptimin si vijon:
2. Aplikant- një person fizik apo juridik, që është një përdorues ekzistues ose i ardhshëm i rrjetit, i cili paraqet një aplikim zyrtar në përputhje me këtë Rregullore për një *lidhjeje* në rrjetin e gazit të një OS.

<sup>1</sup> TYNDP=Ten Year Network Development Plan

<sup>2</sup>Për lehtësinë e përdorimit, termat e përcaktuar në këtë rregullore në shumicën e kohës janë përdorur në shkrim italik.

3. Objekt - një objekt (banesë, shtëpi, ndërtesë, ambiente, fabrikë ose një grup prej secilës prej tyre që është subjekt i një aplikimi të vetëm) i cili tashmë është ose do të jetë gati të lidhet me rrjetin e gazit të OS bazuar në një miratim për *lidhje*.
4. Lidhja - instalimet, pajisjet, mjetet dhe materialet e përdorura në përputhje me miratimin për *lidhjen* për të siguruar furnizimin fizik të sigurt të gazit natyror sipas rastit:
  - i. për *lidhjen* e re të një objekti me rrjetin OS në pikën e lidhjes teknikisht dhe ekonomikisht më të afërt, përfshirë edhe pajisjen matëse ose;
  - ii. për modifikimin e një *lidhje* ekzistuese duke përfshirë rritjen e kapacitetit të saj;
5. Për qëllimet e kësaj *Rregulloreje* termi *lidhje* përfshin të gjitha instalimet, pajisjet, mjetet dhe materialet dhe punime përkatëse të kryera për shtrirjen e rrjetit të OS deri në *pikën e matjes* së aplikantit. Ajo përfshin gjithashtu të gjithë ose pjesë të çdo zgjerimi ose përforcimi tjetër të nevojshëm më thellë në rrjet, siç merret parasysh në pjesën e pagesave të kësaj *Rregulloreje*, por ai nuk përfshin *instalimet e brendshme të gazit* nga ana e klientit matane *pikës se matjes*.
6. Kapaciteti i Lidhjes - Kapaciteti maksimal (pik) i fuqisë i shprehur në MW për të cilin *lidhja* e kërkuar është projektuar dhe do të jetë e aftë të furnizojë.
7. Pika e Lidhjes - vendndodhja fizike në rrjetin ekzistues të gazit natyror të OS që është pika më e afërt teknikisht dhe ekonomikisht me e justifikueshme nga ku fillon instalimi i *lidhjes* së aprovuar drejt *objekteve* të aplikantit.
8. Instalimet e brendshme të gazit – Te gjithë tubacionet dhe pajisjet e lidhura të gazit natyror që ndodhen në ambientet e një *aplikanti*, nga krahu i klientit të *pikës se matjes* dhe që nuk janë pjesë e rrjetit të gazit natyror të OS.
9. Instalues i autorizuar i gazit - një person ose entitet i autorizuar sipas kërkesave ligjore përkatëse për të projektuar në mënyrë të sigurt, dhe/ose të instalojë, dhe/ose të riparojë, dhe/ose të ndryshojë ose të bëjë shtesa të një instalimi gazi ose të ndonjë pjese të tij.
10. Pika e Matjes - vendndodhja fizike në rrjetin e gazit natyror në ambientet e një klienti, ku janë ose do të instalohen valvula mbyllesore kryesore, matësi i gazit dhe pajisjet dhe instalimet shoqëruese . *Pika e matjes* që përmban matësin dhe që i përket OS, është në të njëjtën kohë, pika e referencës në rrjetin e gazit natyror nga ku detyrimet dhe përgjegjësitë mbi rrjetin e tubacioneve zhvendosen nga OS tek klienti për *instalimet e brendshme të gazit*.
11. Kostoja aktuale - kosto direkte që ka OS për një *lidhje* të veçantë.
12. Raporti i përdorimit të kapacitetit të rrjetit - *kapaciteti i lidhjes* i aprovuar që duhet t'i vihet në dispozicion aplikantit, i shprehur si përqindje e kapacitetit total të *tubacionit kryesor* të rrjetit të gazit të OS në të cilin do të lidhet *objekti i aplikantit*.
13. Tubacion Kryesor - një tub me presion të lartë, të mesëm ose të ulët, pjesë e rrjetit të gazit natyror, për orjentimin dhe shpërndarjen e gazit natyror drejt tubacioneve më të vegjël për të arritur tek klientët fundorë dhe familjet.

14. Zgjatje e vogël e rrjetit - një *lidhje* e ndërtuar në zonën e shërbimit të OS, *distanca nga rrjeti* e të cilit është brenda kufijve të mëposhtëm:
- per *lidhjet standard*: deri ne 100 m
  - per *lidhjet ne grup*: deri ne 500 m
  - per *lidhje te personalizuar*: deri në 1 kilometër në mënyrë radiale nga *pika e lidhjes* më e afërt e rrjetit me gaz natyror të OS.
15. Distanca nga rrjeti - distanca reale midis *pikës së matjes* të objektit të aplikantit që synohet të lidhet dhe *pikës së lidhjes* në rrjetin e gazit të OS, e matur përgjatë rrugës të tubacionit *lidhës* që do të ndërtohet.
16. Cmimi i tregut - një çmim ose normë e arritur në treg në kushtet më të favorshme në kohën kur *lidhja* është në shqyrtim ose ndërtim.
17. Operatori i Sistemit ose OS - një operator i sistemit të transmetimit dhe/ose shpërndarjes ose një operator i sistemit të kombinuar për një zonë të caktuar të shërbimit, i licencuar nga ERE në përputhje me nenet 23 pika 2 dhe nenin 23 pika 3 të Ligjit Nr. 102/2015 "Per Sektorin e Gazit Natyror" dhe rregulloren e licencimit të ERE-s, tek i cili *aplikanti* ka aplikuar për një *lidhje*.
18. Lidhje standarde - një *lidhje* (tubacione polietileni ose çeliku) me një rrjet shpërndarës me një presion më të vogël se 6 bar e pajisur me matës gazi dhe rregullator me kapacitet maksimal të përcaktuar prej 10 m<sup>3</sup>/h, për të cilin përdoren pajisje, mjete dhe materiale të standardizuara dhe për të cilin kryhen punime standarde gjatë kohës ndërtimit.
19. Lidhje në grup - një *lidhje* e një ndërtese shumëkatëshe, e një *objekti* zyresh ose një grupim tjetër i klientëve të mundshëm të gazit në rrjetin e shpërndarjes, me një presion pune prej p<6bar. Një *lidhje* e tillë ndërtohet nga *pika e lidhjes* së rrjetit të OS deri në kufirin e pronës ku është instaluar pajisja rregulluese për të gjithë *objektin*, dhe prej andej në dy, ose më shumë pajisje matëse. Tarifat e *lidhjes në grup* shprehen për pajisje matëse dhe marrin parasysh përdorimin e ponderuar të *kapacitetit të lidhjes* dhe gjatësinë(të) respektive.
20. Lidhje e personalizuar - një *lidhje* në:
- Rrjetin e Transmetimit; ose
  - Rrjetin e shpërndarjes, kur presioni tejkalon 6 bar, ose atje ku pajisjet maksimale të matjes/rregullimit mundësojnë tejkalimin e kapacitetit pertej 100 kW.
21. Lidhja e rasteve te vecante - në kuptimin e kësaj *Rregulloreje*, rastet e mëposhtme konsiderohen se janë raste të veçanta për përcaktimin e tarifave të *lidhjes*:
- Modifikimi i një lidhje ekzistuese;
  - Rilidhja e një *objekti* në një rrjet pas një shkëputjeje të detyruar nga rrjeti; dhe
  - Lidhja* brenda rrjetit të të njëjtit OS e një përdoruesi i cili ka pasur tashmë një *lidhje standarte* ose pajisjet matëse si pjese

e një *lidhje ne grup* diku tjetër, në rast zhvendosjeje ose prishjeje të *objektit* të lidhur.

- d. Kostot e lidhjes ne gjysem-thellesi te rrjetit- një tarifë hyrje që i ngarkohet *aplikantit* vetëm një herë, e cila mbulon kostot që lidhen me efektet që shkakton *lidhja* ne thellesi të rrjetit të gazit natyror të OS dhe llogaritet si një funksion i *raportit të përdorimit të kapacitetit të rrjetit*.

22. Marrëveshja e Lidhjes - një marrëveshje standarde ose e negociuar e lidhur midis OS dhe *aplikantit* që ka të bëjë me realizimin e *lidhjes*, siç përshkruhet më tej në nenin 15.

#### Neni 4.

##### Detyrimi për dhënien e një lidhje në rrjet

1. Në varësi të dispozitave të paragrafit (3) më poshtë dhe kriterëve dhe kërkesave të përcaktuara në këtë *Rregullore*, çdo *aplikant* ka të drejtë e *lidhjes* me rrjetin e gazit natyror të OS të licencuar për zonën përkatëse të shërbimit.
2. *Lidhja* për të gjithë përdoruesit e rrjetit të gazit do të sigurohet në mënyrë transparente dhe jo-diskriminuese dhe do të bazohet në një *marrëveshje lidhjeje* të dakortësuar.
  3. OS ka të drejtë të refuzojë një kërkesë për një lidhje nëse përdoruesi i rrjetit ose *aplikanti*:
    - a. nuk ka paraqitur të gjithë dokumentacionin dhe brenda afateve të përcaktuara në këtë *Rregullore*,
    - b. nuk ka përmbushur të gjitha kërkesat teknike dhe standardet, siç parashikohet në Nenin 8,
    - c. nuk lejon që OS të hyjë tek *objektet*, siç parashikohet nga Neni 5,
    - d. nuk i plotëson kriteret për vlerësimin e një aplikimi, siç parashikohet nga Neni 7,
    - e. është debitor dhe nuk ka shlyer detyrimet e mëparshme ndaj OS,
    - f. nuk është i gatshëm të paguajë tarifën e *lidhjes* të llogaritura në përputhje me këtë *Rregullore* (Pjesa III),
    - g. nuk ka shlyer pagesën(at) për *lidhjen* përkatëse siç është rënë dakord në *marrëveshjen e lidhjes* me OS.
4. Rrjeti i OS ka kapacitet të pamjaftueshëm për të plotësuar kërkesën e *aplikantit* dhe nuk është eficient nga ana ekonomike që ta zgjerojë atë.
5. Në rast se OS bazuar në vlerësimin e tij vendos që *lidhja* të mos jepet, OS do t'i japë *aplikantit* një shpjegim të hollësishëm me shkrim, duke i paraqitur të gjitha arsyet teknike, operacionale dhe ekonomike për të cilat është refuzuar aplikimi për *lidhje*.
6. Arsyetimi për një refuzim të përmendur më lart do t'i jepet ERE-s dhe mund të ankimohet në ERE nga *aplikanti*.

## Neni 5.

### E drejta e aksesit në objektet e aplikantit

1. Kur aplikon për një *lidhje*, aplikanti do t'i sigurojë OS të drejtën për të hyrë në *objektet* e tij, në kohën e dakordësuar nga të dy palët, dhe siguron lehtësimet e nevojshme në mënyrë që ky i fundit të mund të vlerësojë të gjitha rrethanat që lidhen me projektimin, ndërtimin dhe përdorimin e mëtejshëm të *lidhjes*, përfshirë kontrollin e *instalimeve të brendshme të gazit* të aplikantit sipas Nenit 9.5 dhe 9.6 të kësaj *Rregulloreje*.
2. OS mund të refuzojë ekzekutimin e një *lidhjeje* bazuar në refuzimin e provuar të hyrjes të përfaqësuesit të OS në ambientet e aplikantit për qëllimet e përmendura më lart.

## Neni 6.

### Kategoritë e Lidhjeve

1. Në varësi të presionit të rrjetit në *pikën e lidhjes*, *kapacitetit të lidhjes*, metodës së *lidhjes* dhe numrit të matësve të instaluar në një *objekt* të vetëm dhe të lidhur me një pajisje rregullimi, *lidhjet* do të grupohen në katër kategori:
  - a. *Lidhje standarde*;
  - b. *Lidhje në grup*;
  - c. *Lidhje e personalizuar*;
  - d. *Lidhje sipas një rasti specifik*.
2. Në rastet e një numri të konsiderueshëm *aplikantësh*, ose *aplikantësh* potenciale për një tip të caktuar *lidhjeje*, e cila nuk përmendet në paragrafin (1) më lart, bëhet prezente për OS, OS do të marrë në konsideratë përcaktimin e llojeve të *lidhjeve* dhe/ose shërbimeve standarde shtesë në përputhje me parimet e kësaj *Rregulloreje* dhe do të kërkojë në vijim miratimin e ERE-s për keto lloje *lidhjesh* të ndryshuara. Pasi të jetë aprovuar, informacionet që kanë të bëjnë me keto lloje *lidhjesh* do të vihen në dispozicion të palëve të interesuara në faqen e internetit të OS si dhe nepermjet komunikimeve të drejtpërdrejta me *aplikantët*.

## Neni 7.

### Kriteret e vlerësimit të një Aplikimi për Lidhje

1. Vlerësimi i një kërkesë për *lidhje* do të bëhet nga OS rast pas rasti.
2. OS do t'i lejojë aplikantit të plotesoje informacionet që mungojnë ose do t'i kërkojë aplikantit sqarime shtesë nëse është e nevojshme brenda afateve të arsyeshme.
3. Koha e përgjithshme për rishikimin dhe miratimin e një *lidhjeje* nuk mund të tejkalojë 2 muaj nga paraqitja e parë e aplikimit, përveç nëse është arritur një marrëveshje për një zgjatje të këtij afati midis OS dhe aplikantit.
4. Bazuar në veçoritë e *lidhjes*, kufijtë tregues të parashikuar nga përkufizimi i *zgjatjes të vogël të rrjetit* dhe kriteret në paragrafin (5) më poshtë, OS do të vlerësojë përputhshmërinë e aplikimit me kërkesën e Nenit 12 të kësaj *Rregulloreje*. Nëse sipas gjykimit të OS, *lidhja* e kërkuar do të ketë një ndikim të konsiderueshëm në zhvillimin e ardhshëm të rrjetit të

gazit, OS do t'i jape *aplikantit* me shkrim arsyet e hollësishme pse rasti specifik nuk kualifikohet si *lidhje* dhe t'a këshilloje dhe mbeshtese atë të veprojë sipas Nenit 1.3 të kësaj *Rregulloreje*.

5. Në vlerësimin e një kerkese për *lidhje*, OS do të sigurojë pajtueshmërinë me kërkesat e:
  - a. Ligjit Nr. 32/2016 "Për garantimin e sigurisë së instalimeve nën presion",
  - b. Rregullat Teknike të miratuara nga Vendimet e Këshillit të Ministrave që garantojnë funksionimin e sigurt të pajisjeve dhe instalimeve të gazit natyror,
  - c. Kodit të Rrjetit dhe Kodit të Matjes,
  - d. Standardet e zbatueshme,
  - e. Çdo kërkesë tjetër ligjore,
6. dhe gjithashtu do të marrë parasysh kriteret e mëposhtme:
  - a. Kërkesat e parashikuara në Nenin 4.3 të kësaj *Rregulloreje*,
  - b. Vendndodhen e *objektit* për të cilin kërkohet *lidhja* duke përfshirë shtrirjen dhe koordinatat e kufijve të tij,
  - c. *Largësia nga rrjeti*,
  - d. Kapaciteti i disponueshëm i rrjetit të OS në atë zonë,
  - e. Aspektet e sigurisë gjatë punimeve të zbatimit dhe fazën operative të *lidhjes* së kërkuar, përfshirë kohën e përgjigjes në rast të situatave emergjente,
  - f. Përputhshmërinë e parametrave teknikë (diametri, kapaciteti, presioni, etj) të *lidhjes* së kërkuar me planin afatgjatë të zhvillimit të rrjetit në zonën përkatëse,
  - g. Aplikimet aktuale dhe potenciale të ardhshme për t'u lidhur në të njëjtën *pikë lidhjeje*,
  - h. Ndikimi i mundshëm në besueshmërinë e furnizimit me gaz natyror duke siguruar që asnjë *lidhje* nuk do të shkaktojë ndonjë efekt negativ tek përdoruesit ekzistues të rrjetit, dhe as *lidhja* nuk duhet të ndikohet negativisht nga ndonjë prej përdoruesve ekzistues të rrjetit,
  - i. Kërkesat e standardit IOS 18001<sup>3</sup>,
  - j. Analiza kosto - përfitime e OS (financiare, ekonomike, sociale) e *lidhjes* së realizuar në përputhje me parimet e përcaktuara nga kjo *Rregullore*.

## **Neni 8.**

### **Kerkesat teknike per projektimin dhe zbatimin e nje lidhje**

1. Cdo *lidhje* është pjesë e rrjetit të gazit natyror të OS dhe OS është përgjegjës për zbatimin dhe përputhshmërinë me të gjitha kërkesat minimale teknike dhe të sigurisë që janë në fuqi, përfshirë:
  - i. Rregullat Teknike dhe të Sigurisë në sektorin e gazit natyror, të miratuara, bazuar në Nenin 10 të Ligjit nr. 102/2015 "Për Sektorin e Gazit Natyror",
  - ii. Standardet Evropiane në sektorin e gazit natyror,
  - iii. Standardet e kompanisë OS,
  - iv. Kodet e rrjetit,
  - v. Çdo rregull dhe normë tjetër në fuqi dhe çdo legjislacion tjetër.

## **Neni 9.**

### **Përgjegjësitë dhe të Drejtat e Operatorit të RrjetSistemit**

1. Në përputhje me Nenin 41 dhe Nenin 53 të Ligjit Nr. 102/2015 "Për Sektorin e Gazit Natyror", OS ka përgjegjësinë për projektimin e sigurt, prokurimin, ndërtimin, testimin, komisionimin dhe vënien në punë të një *lidhjeje* të aprovuar.
2. Edhe kur nënkontraktin punimet e *lidhjes*, OS ende mbetet përgjegjëse dhe siguron që zgjedhja e pajisjeve, mjeteve dhe materialeve dhe zbatimi i punimeve të *lidhjes* të kryhen në përputhje me legjislacionin aktual dhe standardet e veta të OS.
3. OS do të ofrojë bashkëpunimin e saj më të mirë për çdo *aplikant* të interesuar për një *lidhje* në përputhje me dispozitat dhe afatet e kësaj *Rregulloreje*.
4. OS është përgjegjës për të gjithë sistemin e gazit natyror deri në *pikën e matjes*. Përtej *pikës së matjes*, përgjegjësia i mbetet *aplikantit*.
5. OS do të mbetet përgjegjës për kryerjen e kontrolleve teknike të *instalimeve të brendshme të gazit* në të cilat OS shpërndan gaz natyror, duke siguruar që ato funksionojnë në përputhje me rregulloret teknike në fuqi.
6. OS bën kontrollimin e *instalimeve të brendshme të gazit* para dhe gjatë vendosjes në operim të *lidhjes* dhe në çdo kohë tjetër kur konsiderohet e nevojshme, duke njoftuar paraprakisht *aplikantin*.
7. Pasi vënia në punë të përfundojë me sukses dhe të dokumentohet, e gjithë përgjegjësia për *instalimet e brendshme të gazit* bie mbi klientin përkatës në përputhje me Nenin 10.5 të kësaj *Rregulloreje*.
8. Gjatë zbatimit të punimeve civile, OS do të sigurojë që të gjitha rregulloret përkatëse të autoriteteve qendrore dhe vendore janë respektuar dhe do të sigurojë që *aplikanti* nuk do të dëmtohet nga ndonjë pasojë e veprimeve të papërshtatshme.

## **Neni 10.**

### **Përgjegjësitë dhe të Drejtat e Aplikantit**

1. *Aplikanti* do të lejojë hyrjen e OS në objektet e tij, siç parashikohet në Nenin 5 dhe Nenin 9.5 dhe 9.6 të kësaj *Rregulloreje*.
2. *Aplikanti* do të sigurojë të gjithë informacionin dhe dokumentacionin e nevojshëm, përfshirë çdo leje të nevojshme për realizimin e *lidhjes* së kërkuar. Në rast të kundërt kjo mund të rezultojë në refuzimin e *lidhjes* së kërkuar.
3. Një *aplikant* mund të aplikojë për një *lidhje* ose drejtperdrejt, ose nëpërmjet një pale të tretë, të autorizuar nga ai.
4. Në përputhje me Nenin 17.1 të kësaj *Rregulloreje* gjatë vlerësimit të projektit të *lidhjes* dhe ofertës financiare të bërë nga OS, *aplikanti* mund të përfshijë një *instalues të autorizuar të gazit* me shpenzimet e veta.
5. *Aplikanti* siguron që ndërtimi ose modifikimi i çdo *instalimi të brendshëm të gazit* në objektet e tij, mund të kryhet vetëm nga një *instalues i autorizuar i gazit* në përputhje me Rregulloret Teknike dhe rregullat dhe normat në fuqi dhe se *instalimet e brendshme të gazit* do të përdoren në përputhje me udhëzimet përkatëse.
6. Për projektimin dhe zbatimin e punimeve të *instalimeve të brendshme të gazit* në objektin e *aplikantit*, *aplikanti* mund ose:
  - i. të bjerë dakort me OS për të zgjeruar *marrëveshjen e lidhjes* për të përfshirë edhe ndërtimin e *instalimeve të brendshme të gazit* brenda objektit të *aplikantit* bazuar në çmimet e tregut, ose.
  - ii. të kryejë vetë ndërtimin e *instalimeve të brendshme të gazit*, duke përdorur një *instalues të autorizuar të gazit*. Pavarësisht kësaj zgjedhjeje, OS ka të drejtë dhe përgjegjësi të kryejë detyrat e parashikuara në Nenin 9.5 dhe 9.6.
7. *Aplikanti* nuk do të ngarkojë OS me asnjë përgjegjësi dhe detyrim që mund të vijnë nga dëmet e shkaktuara nga çdo ndërhyrje e paautorizuar e bërë në *instalimet e brendshme të gazit* brenda objektit dhe/ose përdorimi i papërshtatshëm i instalimeve në fjalë.

## **PJESAI: PROCEDURAT E APLIKIMIT DHE TË ZBATIMIT**

### **Neni 11.**

#### **Informimi i publikut dhe dorëzimi i aplikimit**

1. Çdo palë e interesuar për një *lidhje* do të jetë në gjendje të tërheqë udhëzimet dhe informacionet për *lidhjen* në faqen e internetit të OS, dhe/ose të kontaktojë drejtpërdrejtë me OS, dhe/ose me anë të korrespondencës me shkrim, duke kërkuar detajet dhe shpjegimet e nevojshme për *lidhjen* e synuar.
2. OS do të sigurojë që informacioni dhe shpjegimet e kërkuara do të jepen pa pagesë, brenda 7 ditëve nga marrja e shprehjes së interesit të *aplikantit*.
3. Brenda 12 muajve nga miratimi i kësaj *Rregulloreje*, OS do të publikojë në faqen e saj të internetit në një gjuhë lehtësisht të kuptueshme, format të mirë strukturuar dhe lehtësisht të aksesueshëm e të përdorshëm:



- a. përfitimet e përdorimit të gazit natyror së bashku me rregulloret dhe udhëzimet për përdorimin e sigurt të tij,
  - b. një hartë të përditesuar dhe të saktë të rrjetit të gazit natyror në zonën e shërbimit të OS dhe karakteristikat kryesore të tij,
  - c. kategoritë e *lidhjeve* të vëna në dispozicion për përdoruesit e rrjetit së bashku me karakteristikat teknike standarde dhe kërkesat minimale për secilën prej tyre,
  - d. udhëzimet, shpjegimet dhe formatet e nevojshme për t'u përdorur kur aplikohet për një *lidhje*,
  - e. listën e informacionit të kërkuar për secilën kategori *lidhjeje*, siç parashikohet në Nenin 12,
  - f. lejet e nevojshme të marra, ose për t'u marrë nga OS dhe lejet e nevojshme që duhet të merren nga *aplikanti*,
  - g. formati i aplikimit që duhet të plotësohet për secilën kategori të *lidhjes*,
  - h. formati i *marrëveshjes se lidhjes* për kategoritë e ndryshme të *lidhjes*,
  - i. koha e pritshme për secilin hap të procedurës së *lidhjes*,
  - j. listën e *instaluesve të autorizuar të gazit* së bashku me detajet e kontaktit të tyre që *aplikanti* mund të përdorë për të përfunduar *instalimet e brendshme të gazit* ose për vlerësimin e ofertës,
  - k. kostot e aprovuara për *lidhjet* standarde dhe kostot indikative për kategoritë e tjera të llogaritura në përputhje me Pjesën III të kësaj *Rregulloreje*,
4. Formulari i aplikimit për njërin nga kategoritë e *lidhjes*, siç parashikohet në nenin 6 të kësaj *Rregulloreje*, mund të paraqitet nga *aplikanti* ose:
- a. online, duke ndjekur udhëzimet e dhëna në faqen e internetit të OS. Në raste të tilla, kopjet origjinale të printuara (ose në masën që është e nevojshme - kopje të noterizuar) të aplikimit dhe dokumentacionit mbështetës gjithashtu do të dorëzohen ose dërgohen në zyrat e OS ose,
  - b. duke dorëzuar drejtpërdrejt në zyrat e OS një kopje origjinale ose të noterizuar të formularit të plotësuar të aplikimit dhe dokumentacionit mbështetës.
5. Aplikimi dhe ndjekja e tij regjistrohet në bazën e të dhënave të *lidhjes* te OS, siç parashikohet në Nenin 18 të kësaj *Rregulloreje*.

## Neni 12.

### Dokumentat e kërkuar për një Aplikim

1. Për të gjitha kategoritë e *lidhjeve* një kërkesë do të përmbajë informacionin e përgjithshëm të mëposhtëm:

- a. Letra e aplikimit për *lidhjen* që specifikon njërin nga kategoritë e *lidhjes* të listuara në Nenin 6.
- b. Kopje e Dokumentit të Identitetit (ID) ose e pasaportës së pronarit të shtëpisë, ose.
- c. Fotokopje e Numrit Unik të Identifikimit të Subjektit (NUIS) së bashku me ID të administratorit në rastin e një personi. qe ushtron aktivitet ekonomik.
- d. Detajet e kontaktit të individit përgjegjës, ose të administratorit në rastin e një kompanie.
- e. Adresa e *objektit* për të cilin paraqitet aplikimi për *lidhje*.
- f. Marrëdhënia e pronësisë me *objektin*; çertifikatë pronësie të lëshuar nga zyra e regjistrimit të pasurive të paluajtshme, kontrata e blerjes, akti i dhurimit, kontrata e qirasë etj.
- g. Paraqitja e *objektit* në shkallë 1: 1000 (dy kopje), përfshirë koordinatat e kufijve të tij.
- h. Koncepti, ose projekti i para fizibilitetit, ose projekti teknik i *lidhjes* së kërkuar, nëse ka.
- i. Identitetin e përfaqësuesit të autorizuar ose *instaluesit të autorizuar të gazit* nëse aplikohet.

2. Një kërkesë për një *lidhje standarde*, përveç informacionit të përgjithshëm sipas paragrafit (1) më lart, gjithashtu do të përmbajë:

- a. Informacion mbi qëllimin e përdorimit të gazit, që mund të jetë për gatim, ngrohje ose nxehje të ujit,
- b. Një vlerësim i konsumit vjetor i përlllogaritur në metra kub ose në kilovat-orë gaz,
- c. Leje(t), të cilat *aplikanti* i ka marrë tashmë në lidhje me këtë kategori *lidhjeje*.

3Një kërkesë për *lidhje në grup*, përveç informacionit të përgjithshëm sipas paragrafit (1) më lart, gjithashtu përmban:

- a. Vërtetim për pagesën e tarifës së aplikimit prej 50,000 lekësh shqiptare,
  - b. Informacione mbi natyrën e objekteve që do të furnizohen me gaz natyror,
  - c. Numri i pajisjeve matëse që do të instalohen që në fillim dhe zhvillimi i pritshëm i numrit të pajisjeve të reja matëse që do të lidhen në degëzimin e shumëfishtë,
  - d. Numri maksimal i pajisjeve matëse që mundet të lidhen në degëzimin e shumëfishtë,
  - e. Debiti maksimal për gaz (peak) i kërkuar,
-

- f. Një vlerësim i profilit ditor dhe vjetor i konsumit të gazit dhe ndryshimi i tij i pritshëm me kalimin e kohës,
- g. Kontrata e furnizimit ose një marrëveshje tip paraprake me furnizuesin e mundshëm të gazit,
- h. Niveli i dëshiruar i presionit,
- i. Leje(t), të cilat *aplikanti* i ka marrë tashmë në lidhje me këtë kategori *lidhjeje*,
- j. Leje(t), të cilat *aplikanti* është gati t'i marrë, ose të ndihmojnë OS në marrjen e tyre.

4. Një kërkesë për *lidhje të personalizuar*, përveç informacionit të përgjithshëm në paragrafin (1) më lart, duhet gjithashtu të përmbajë:

- a. Vërtetim për pagesën e tarifës së aplikimit prej 100,000 lekësh.
- b. Informacione të përgjithshme për veprimtarinë e biznesit të *aplikantit* dhe përdorimin e mëparshëm dhe të ardhshëm të gazit dhe/ose ndonjë lloj tjetër të energjisë.
- c. Informacione për natyrën e *objekteve* që do të furnizohen me gaz natyror.
- d. Kontraten tip të furnizimit me gaz dhe identitetin e furnizuesit.
- e. Sasia maksimal për gaz (peak) i kërkuar.
- f. Një vlerësim i profilit ditor dhe vjetor të konsumit të gazit.
- g. Nivelin e dëshiruar të presionit.
- h. Leje(t), të cilat *aplikanti* tashmë i ka marrë për realizimin e *lidhjes* së tij.
- i. Leje(t), të cilat *aplikanti* është gati të marrë, ose të ndihmojë për marrjen e tyre për realizimin e *lidhjes* së tij.

5. Një kërkesë për një *lidhje të një rasti të vecantë*, përveç informacionit të përgjithshëm në paragrafin (1) më lart, duhet gjithashtu të përmbajë:

- a. Vërtetim për pagesën e tarifës së aplikimit prej 10,000 lekësh.
- b. Informacione për natyrën e *objekteve* që do të furnizohen me gaz natyror.
- c. Debiti maksimal për gaz (peak) i kërkuar.
- d. Një vlerësim i profilit ditor dhe vjetor të konsumit të gazit.
- e. Nivelin e dëshiruar të presionit.
- f. Leje(t), të cilat *aplikuesi* tashmë i ka marrë për realizimin e *lidhjes* së tij.

### **Neni 13.**

#### **Afatet për përfundimin e procesit të aplikimit**

---

1. Pas paraqitjes së një kërkesë për *lidhje*, siç parashikohet në Nenin 11 dhe Nenin 12 të kësaj Rregulloreje, OS do të lëshojë menjëherë një konfirmim për pranimin e kërkesës, duke përmendur kohën e paraqitjes së tij dhe do të sigurojë informacione standarde në lidhje me skedulën e parashikuar për vlerësimin e tij dhe hapat e tjerë parashikues të procesit, duke përfshirë kohën, lejet për të marrë etj.
2. Jo më vonë se 15 ditë kalendarike nga paraqitja e aplikimit, OS do të:
  - a. në rast të mungesave në dokumentacion, informojë *aplikantin* të paraqesë çdo të dhënë dhe/ose informacion të munguar që është identifikuar gjatë vlerësimit paraprak të kryer nga OS. *Aplikanti* duhet të sigurojë informacionin e munguar dhe sqarimet brenda 15 ditëve kalendarike nga data e marrjes së kërkesës nga OS.
  - b. konfirmojë plotësinë e aplikimit dhe bie dakort me *aplikantin* për ditën kur eksperti i OS mund të vizitojë vendin ku kërkohet *lidhja*. Me përjashtim të rastit kur kushtet e motit nuk lejojnë kryerjen e vizitës në terren, ajo duhet të realizohet jo më vonë se 7 ditë kalendarike pas ditës së marrjes së përgjigjes nga OS.
  - c. informojë *aplikantin* që çështja nuk kualifikohet si një *lidhje* dhe e udhëzon atë që të veprojë në bazë të Nenit 7.4 dhe Nenit 1.3 të kësaj Rregulloreje.
3. I gjithë procesi për plotësimin e një aplikimi për *lidhje*, përfshirë vizitën në terren dhe takimet me *aplikantin*, në asnjë rast nuk do të zgjatë më shumë se 30 ditë nga dita e parë e dorëzimit të tij.

#### **Neni 14.**

##### **Projekti Teknik dhe Procesi i Vlerësimit të Kostos**

1. Pas mbledhjes së të gjitha informacioneve që mungojnë, sqarimeve shtesë, vizitës në terren dhe çdo takimi tjetër me *aplikantin*, OS do të ndërmarrë përgatitjen e projektit teknik dhe vlerësimin e kostos për anën e tij perkundrejt *pikës së matjes*, dhe pastaj do t'ia paraqesë ato *aplikantit* brenda afateve vijuese nga marrja e aplikimit të plotë për *lidhje*:
    - a. 1 muaj për një *lidhje standarde*.
    - b. 3 muaj për një *lidhje në grup*.
    - c. 4 muaj për një *lidhje të personalizuar* ose ashtu si është rënë dakord ndërmjet *aplikantit* dhe OS në rast të një *marrëveshjeje lidhjeje* të negociuar.
    - d. në varësi të situatave specifike për një *lidhje të një rasti të veçantë* ose ashtu si është rënë dakord ndryshe ndërmjet *aplikantit* dhe OS në rast të një *marrëveshjeje për lidhje* të negociuar.
-

2. Projekti teknik dhe vlerësimi i kostos së *lidhjes* do të përgatiten duke marrë parasysh që:
  - a. kur është e mundur, do të merret në konsideratë më shumë se një mundësi alternative teknike për *lidhjen*.
  - b. në përputhje me Pjesën III të kësaj *Rregulloreje*, vlerësimi i kostos së projektit të *lidhjes* do të bëhet në bazë të *çmimeve* aktuale të *tregut* për secilin nga opsionet e *lidhjes* të zgjedhur.
  - c. zgjedhja e opsionit më efikas midis alternativave të ndryshme do të bazohet në kriteret e dhëna në Nenin 7 dhe Pjesën III të kësaj *Rregulloreje*.
3. Në rast se OS ofron zbritje ose lehtësime për një *aplikant*, të njëjtat zbritje dhe/ose lehtësime do t'i ofrohen gjithashtu çdo *aplikanti* tjetër për *lidhje*.

### Neni 15.

#### Oferta e Lidhjes

1. Pas zgjedhjes së alternativës më të mirë dhe përfundimit të projektit të *lidhjes* dhe vlerësimit të kostos siç parashikohet në Nenin 14 më lart, OS do të informojë *aplikantin* me shkrim dhe duke e protokolluar atë për:
  - a. Miratimin e *lidhjes*. Në këtë rast OS do t'i japë *aplikantit* një ofertë për ndërtimin e projektit të *lidhjes* që do të përbëhet nga:
    - b. vendndodhjet e sakta të *pikës së lidhjes* dhe të *pikës së matjes*
    - c. projekti teknik
    - d. *kostot e lidhjes në gjysëm thellësi të rrjetit*
    - e. kosto totale e projektit e llogaritur në përputhje me Pjesën III të kësaj *Rregulloreje*
    - f. draftin e *marrëveshjes së lidhjes*
    - g. garancinë bankare të kërkuar
    - h. kohën e propozuar për zbatimin e *lidhjes*
    - i. skedulën e pagesave që duhet të bëhen nga *aplikuesi*
    - j. Refuzimin e kërkesës për *lidhje* së bashku me arsyetimin e hollësishëm për një vendim të tillë, përfshirë informacionin për mënyrën e apelimit në OS dhe më pas në ERE.

Pas marrjes së vendimit të OS, siç parashikohet në paragrafin më lart, brenda 15 ditëve kalendarike, *aplikanti* kur merr një ofertë mund :

- a. të pranojë ofertën duke firmosur dhe dërguar *marrëveshjen e lidhjes* në OS dhe duke ekzekutuar këstin e parë dhe duke përmbushur të gjitha aspektet e tjera siç parashikohet në *marrëveshjen e lidhjes*, ose

- b. të kundërshtojë ofertën dhe i kërkon OS që të fillojë një procedurë konsultimi dhe negociimi dhe në rast të dështimit të negociatave, të paraqesë një ankesë në përputhje me Nenin 17 të kësaj *Rregulloreje*, ose
- c. të refuzojë ofertën. Nëse *aplikanti* nuk ndërmer asnjë veprim brenda 15 ditëve nga marrja e informacionit, atëherë do të konsiderohet si një refuzim automatik dhe *aplikanti* do të duhet të paraqesë përsëri një aplikim të ri, në qoftë se ai është përsëri i interesuar për një *lidhje*.
- d. kur kërkesa është refuzuar, të kërkojë sqarime shtesë nga OS në përputhje me Nenin 17 të kësaj *Rregulloreje*.

### **Neni 16.**

#### **Zbatimi dhe vënia në operim e afateve kohore**

1. Pas nënshkrimit të *marrëveshjes për lidhje*, OS ose drejtpërdrejt ose duke nënkontraktuar një *instalues tjetër të autorizuar të gazit* do të zbatojë punimet civile të projektit për *lidhjen* përkatëse sipas kërkesave të cilësisë të parashikuara nga legjislacioni dhe afatet e parashikuara nga kjo *Rregullore* dhe në *marrëveshjen e lidhjes*.
2. Pas përfundimit të punimeve, OS do të testojë dhe komisionojë të gjithë instalimin e *lidhjes* së përfunduar së bashku me *instalimet e brendshme të gazit* të klientit. Vetëm pas testimit dhe komisionimit të suksesshëm, objektet e *aplikantit* do të vihen në operim.
3. I gjithë cikli që nga paraqitja e aplikimit për *lidhje* deri në momentin e vënies në operim të kategorive të ndryshme të *lidhjes* duhet të bëhen brenda afateve vijuese:
  - a) *lidhje standarde*; 3 muaj dhe në asnjë rast më shumë se 4 muaj përveç nëse është rënë dakord ndryshe ndërmjet palëve.
  - b) *lidhja në grup*; 5 muaj dhe në asnjë rast më shumë se 6 muaj përveç nëse është rënë dakord ndryshe ndërmjet palëve.
  - c) *lidhje e personalizuar*; 6 muaj ose ashtu si është rënë dakord ndërmjet *aplikantit* dhe OS në rastin e një *marrëveshje për lidhje* të negociuar.
  - d) *lidhje e një rasti të veçantë*; në varësi të rrethanave specifike ose ashtu si është rënë dakord ndërmjet *aplikantit* dhe OS në rast të një *marrëveshjeje lidhjeje* të negociuar.

### **Neni 17.**

#### **Ankesat**

1. Në rastet kur në përputhje me Nenin 15.2.(a)(ii) dhe 15.2.(b) të kësaj *Rregulloreje*, *aplikanti* dëshiron të bëjë një vlerësim të pavarur të projektit teknik të *lidhjes* dhe ofertës financiare, ai ka të drejtën që me shpenzimet e veta të përfshijë një *instalues të autorizuar*

të gazit. OS pas marrjes se një kërkesë nga *aplikanti* do t'i vërë në dispozicion atij pa pagesë:

- a. projektin e hollësishëm teknik dhe vlerësimet përkatëse të kostos së tij.
  - b. të dhënat teknike përkatëse dhe kushtet e rrjetit nën të cilat do të zbatohet *lidhja* e kërkuar.
  - c. kërkesat minimale teknike të OS që duhet të përmbushen nga instalimet e reja dhe pajisjet që do të instalohen.
  - d. *pikën e lidhjes* së bashku me çdo mundësi tjetër alternative nëse është e mundur.
  - e. çdo informacion tjetër të nevojshëm për vlerësimin e duhur të çështjes siç kërkohet në mënyrë specifike dhe të arsyeshme nga *aplikanti*.
2. Pas përfundimit të vlerësimit, të dy palët do të negociojnë në mirëbesim për të arritur një marrëveshje.
  3. Në rast se OS dhe *aplikuesi* nuk arrijnë marrëveshje, *aplikanti* mund t'a paraqesë çështjen në ERE.

#### **Neni 18.**

##### **Baza e të dhënave të Lidhjeve dhe Raportimi**

1. Brenda 12 muajve nga miratimi i kësaj *Rregulloreje*, OS do të krijojë një bazë të dhënash elektronike (IT) për monitorimin e *lidhjeve*, e aftë të regjistrojë dhe të mundësojë aksesin nga ERE në të dhënat aktuale dhe historike për *lidhjet* për të cilat është paraqitur një aplikim dhe ato të përfunduara, së bashku me veprimet në kohë për to, produktet standarde dhe jo standarde të *lidhjeve* të ofruara, kapacitetet dhe veçoritë teknike, tarifat e marra dhe shpenzimet e bëra, si dhe strukturën e kostos.
2. Në vijim të krijimit të bazës së të dhënave për monitorimin e *lidhjeve* dhe në asnjë rast më vonë se dy vjet nga miratimi i kësaj *Rregulloreje* ose nga data e licencimit të OS nga ERE, cilado rrethane që të ndodhe, OS është e detyruar të paraqesë në ERE të dhëna dhe informacione të nevojshme për monitorimin e *lidhjeve* me rrjetet, përfshirë të dhënat dhe informacion mbi:
  - a. numrin e aplikimeve të paraqitura, të miratuara dhe të zbatuara për t'u lidhur nga grupet e klienteve;
  - b. numrin e klientëve të shkëputur.

#### **Neni 19.**

##### **Marrëveshja e Lidhjes**

1. Brenda një viti nga hyrja në fuqi e kësaj *Rregulloreje*, OS do të hartojë dhe paraqesë për miratim në ERE *marrëveshjet e lidhjeve* të standardizuara për të gjitha llojet e kategorive të *lidhjes*.
-

2. *Marrëveshjet e lidhjes* të standardizuara dhe të miratuara do të publikohen në faqen e internetit të OS.
3. *Marrëveshja e lidhjes* do të përmbajë ndër të tjera:
  - a. identitetin e palëve.
  - b. detajet teknike të *lidhjes*.
  - c. skedulën e pagesave.
  - d. skedulën e punimeve të ndërtimit dhe aktivitetet përkatëse.
  - e. detyrimet e palëve.
4. Për *lidhjet e personalizuara* dhe *lidhjet e rasteve të veçanta*, termat dhe kushtet e *marrëveshjes së lidhjes* mund të jenë subjekt i negociatave midis OS dhe *aplikantit*.

#### **Neni 20.**

##### **Aplikime të shumëfishta**

1. Në rast se pothuajse në të njëjtën kohë paraqiten më shumë se një aplikim dhe rruget e linjave përkatëse të *lidhjes* mbivendosen plotësisht, ose pjesërisht, OS do të konsiderojë dhe/ose mundesojë një marrëveshje midis *aplikantëve* për optimizimin dhe ndarjen e kostove midis tyre, bazuar në parimin e përdorimit të ponderuar të kapacitetit të *lidhjes* dhe gjatësive përkatëse të rrjeteve që u shërbejnë klientëve.
2. Kur, në gjykimin e OS, përveç një *aplikanti* të vetëm ekziston mundësia që edhe palë të tjera të përdorin gaz në të ardhmen e afërt, OS do të organizojë një takim të palëve në fjale dhe do të bëjë një vlerësim të kërkesës për gaz brenda së njëjtës zonë të rrjetit, dhe do ta marrë atë në konsideratë në projektimin e *lidhjes*. Ky qëllim sidoqoftë duhet të shmangë mbipagesën për *aplikantin(tët)* e parë.

### **PJESA III: TARIFAT E LIDHJES.**

#### **Neni 21.**

##### **Kriteret për përcaktimin e tarifave të lidhjes**

- 1) Kriteret për përcaktimin e tarifave të *lidhjes* përfshijnë:
    - a) Kapacitetin e aprovuar të *lidhjes*.
    - b) Kushtet e terrenit që karakterizojnë vendndodhjen e *lidhjes* dhe nëse *lidhja* do të kryhet në mjedise urbane ose rurale.
    - c) Lloji i pajisjeve, mjeteve (përfshirë pajisjet matëse) dhe materialet e përdorura për përfundimin e një *lidhjeje* të veçantë.
    - d) Lloji i punimeve të nevojshme për t'u kryer për të mundësuar lidhjen.
  - 2) Kur përcakton dhe llogarit *tarifat e lidhjes*, OS do të përfshijë vetëm kostot aktuale, për të cilat do të japë edhe ndarjen e detajuar.
-



## Neni 22.

### Ndarja e detajuar e kostove të lidhjes

- 1) Ndarja e detajuar e kostove do të përfshijë:
  - a) Kostot e përgatitjes së projektit dhe të mbledhjes së dokumentacionit të kërkuar;
  - b) Kostot e blerjes së pajisjeve, mjeteve dhe materialeve të nevojshme për *lidhjen*;
  - c) Kostot e punimeve;
  - d) Kostot e punimeve specifike dhe operationale që kërkohen për të lidhur një *objekt* me rrjetin;
  - e) Pjesa e kostove të sistemit që shkaktohen si parakusht për lidhjen e një *objekti* në rrjetin e shpërndarjes ose transmetimit (*kostot e lidhjes ne gjysem thellesi te rrjetit*); dhe
  - f) Çdo kosto tjetër që konsiderohet e nevojshme për përfundimin e *lidhjes*, ashtu si është aprovuar nga ERE.

## Neni 23.

### Rregulla të përgjithshme në lidhje me tarifën e lidhjes

- 1) Kur përcakton tarifën e *lidhjes*, OS do të marrë parasysh parimet e *kostove të lidhjes në gjysëm thellësi të rrjetit*.
  - 2) OS mund të përcaktojë *raportin e përdorimit të kapacitetit të rrjetit* për secilin seksion të veçantë të rrjetit, në të cilin është bërë *lidhja* individuale, ose mund të zgjedhë të përdorë një vlerë të vetme të *raportit të përdorimit të kapacitetit të rrjetit* për të gjitha pjesët e rrjetit të OS me presione pune poshtë dhe mbi 6 bar (përkatesisht për *lidhje standarde* dhe të *personalizuara* ose *lidhje ne grup*).
  - 3) OS do të aplikojë tek ERE për miratimin e ndarjes së detajuar të kostove dhe tarifave përfshirë edhe *kostot e lidhjes ne gjysem thellesi te rrjetit* (për çdo kategori *lidhjeje*) jo më vonë se 18 muaj nga hyrja në fuqi e kësaj *Rregulloreje*.
  - 4) Për çdo vit pasardhës pas miratimit të parë sipas paragrafit 3 më sipër, OS do të paraqesë tek ERE për miratim jo më vonë se data 30 nëntor ndarjen e detajuar të kostove dhe tarifave përfshirë edhe *kostot per lidhjen ne gjysem thellesi te rrjetit* (për çdo kategori *lidhjeje*) përpara zbatimit të tyre gjatë vitit në vijim.
  - 5) Pas aprovimit të tarifave të *lidhjes*, OS do të bëjë shpalljen e tyre nepermjet publikimit në faqen e tij të internetit.
  - 6) OS mund të bëjë zbritje dhe ofroje kushte të vecanta pagese për tarifën e *lidhjes*, por të tilla përfitime do t'ju ofrohen të gjithë përdoruesve të mundshëm në të njëjtat kushte.
-

- 7) Projekti i *lidhjes* i përgatitur nga OS dhe pranuar nga *aplikanti* dhe çmimi përkatës që do të paguhet për *lidhjen* kur është rënë dakord do të jenë përfundimtar, përveç rasteve që është rënë dakord ndryshe në *marrëveshjen e lidhjes* midis palëve. Çdo ndryshim i projektit të *lidhjes* si rezultat i modifikimeve të mëvonshme të bëra në mënyrë të njëanshme nga OS gjatë zbatimit të tij nuk do të rezultojë në kosto shtesë për *aplikantin*.

## Neni 24.

### Përcaktimi i tarifave standarde të lidhjes

- 1) Në varësi të kapacitetit maksimal të *lidhjes*, ose llojit të matësit, përcaktohen llojet e mëposhtme të *lidhjeve*:

Lloji i Matesit	Kapaciteti maksimal
G-4	40 kW
G-6	60 kW
G-10	100 kW

- 2) Tarifat *standarde të lidhjes* përfshijnë të gjitha kostot që kanë të bëjnë me ndërtimin e *lidhjes* nga *pika e lidhjes* deri në *pikën e matjes* dhe përcaktohen për secilin lloj të një *lidhjeje standarde* sipas paragrafit (1) më lart, mbi bazën e:
- Kostos mesatare vjetore të përgatitjes së projektit dhe mbledhjes së dokumentacionit të kërkuar për *lidhjen standarde* të një lloji të veçantë. Për qëllim të vlerësimit të tarifave për vitin e parë, OS mund të përdorë vlerësime kostoje të arsyeshme dhe të detajuara;
  - Sasive mesatare vjetore të standardizuara të pajisjeve, mjeteve dhe materialeve të nevojshme për instalimin e *lidhjeve standarde* të një lloji të veçantë;
  - Kostos mesatare vjetore të punimeve për ndërtimin e *lidhjes standarde* të një lloji të veçantë, dhe
  - Kostos mesatare vjetore të punimeve specifike dhe operacionale që kërkohen për të lidhur objektet me rrjetin.
- 3) Tarifat e *lidhjes standarde* do të ndahen në dy grupe:
- Tarifë fikse e *lidhjes standarde*, për cdo lloj *lidhjeje standarde* në një *distancë nga rrjeti* deri në 20 metra; dhe
  - Tarifë e ndryshueshme e *lidhjes standarde*, e cila do të varet nga gjatësia shtesë për çdo *distancë nga rrjeti* që tejkalon 20 metra. Tarifa e ndryshueshme e *lidhjes standarde* duhet të shprehet për çdo metër *distancë* për secilin lloj të *lidhjeje standarde*.
- 4) OS ka të drejtë të ngarkojë tarifën Fikse të *lidhjes standarde* për secilin lloj të *lidhjeve standarde*, përfshirë rastet kur *distanca nga rrjeti* është më e shkurtër se 20 metra.

- 5) Ndarjet e detajuara të kostos së *lidhjes* dhe tarifat e *lidhjes* - të dyja për secilin lloj të *lidhjeve standarde* - do të miratohen nga ERE para aplikimit të tyre.

## Neni 25.

### Përcaktimi i tarifave për lidhjet e personalizuar

Tarifat për *lidhje të personalizuar* janë të barabarta me shumën e kostove aktuale të:

- a) Përgatitjes së projektit;
- b) Mbledhjes së dokumentacionit të nevojshëm, lejet e dhëna nga të gjitha autoritetet përkatëse dhe/ose miratimet e tyre;
- c) Shpenzimeve të pronës për një *lidhje* të veçantë, nëse kjo do të ishte e nevojshme;
- d) Kryerjes së punimeve përgatitore të nevojshme për realizimin e *lidhjes*;
- e) Blerjes së pajisjeve, mjeteve dhe materialeve të nevojshme për realizimin e *lidhjes*;
- f) Punëtorëve të angazhuar në ndërtim, makinerive dhe punimeve elektrike që lidhen me ndërtimin e një *lidhjeje*, përdorimin e makinerive të drejtuara nga operatori, mjetet speciale dhe pajisjet, dhe përdorimin e automjeteve me shofer;
- g) Pajisjes së *pikës së matjes*;
- h) Projektimit gjeoteknik dhe gjeodezik të rrugës, studimeve të rrugës së *lidhjes* dhe përditësimit të librave kadastral të tubacionit dhe modifikimet në hartat përkatëse kadastrale;
- i) Komisionimit dhe vënies në punë;
- j) Kryerjes së punimeve të tjera të specializuara dhe operacionale që kërkohen për të lidhur një *objekt* në rrjet: vizitat në vend për të identifikuar vendndodhjen e objekteve, rrjeteve dhe rrugëve të *lidhjes*; mbikëqyrjes profesionale të ndërtimit, montimit të makinerive dhe punimeve në tubacionet e gazit; dhe kontrollit teknik të *instalimeve të brendshme të gazit* para furnizimit fillestar me gaz të *lidhjes*, në përputhje me Rregulloren Teknike dhe Kodin e Rrjetit me të cilin do të lidhet *objekti* dhe kriteret e specifikuar në këtë *Rregullore*.

## Neni 26.

### Përcaktimi i tarifave për lidhjet në grup

- 1) Kostot e *lidhjes në grup* përcaktohen sipas të njëjtës metodologji si për *lidhjet e personalizuar*.
  - 2) Tarifat e *lidhjes* bazohen në koston e *lidhjes në grup* të ponderuara me numrin e pajisjeve matëse individuale dhe kapacitetit të instaluar brenda *objektit*.
-

- 3) Kostoja e përgjithshme e *lidhjes në grup* mund të mbartet fillimisht nga pronari i *objektit* dhe t'i kthehet atij më vonë nga pronarët/përdoruesit e apartamenteve/zyrave individuale, bazuar në parimet e tarifimit sipas paragrafit 2) më lart.

### **Neni 27.**

#### **Përcaktimi i tarifave të lidhjes për rastet e vecantë**

- 1) Tarifat për *lidhje të rasteve të vecantë* përcaktohen sipas metodologjisë së mëposhtme:
- a) *Kostot e lidhjes në gjysëm thellësi të rrjetit* që kanë të bëjnë me një *lidhje të një rasti veçantë* përcaktohen vetëm për rritjen e kapacitetit të aprovuar;
  - b) Në masën kur ekziston nevoja për të zëvendësuar *pajisjen matëse* (për shembull, në rastet kur matesi ekzistues ka tejkaluar 50% të jetës së tij), do të jetë kostoja e pajisjes së re matëse;
  - c) në rast të modifikimeve të një *lidhje*, tarifat e *lidhjes* përcaktohen bazuar në kostot aktuale shtesë të bëra për realizimin e një *lidhjeje* të tillë;
  - d) kur *lidhja* e një *objekti* bëhet pas një shkëputje të detyruar, tarifat e *lidhjes* përcaktohen bazuar në kostot aktuale shtesë të bëra për realizimin e një *lidhjeje* të tillë;
  - e) Në rast të një *lidhjeje* të re, për shkak të zhvendosjes ose prishjes së një *objekti* që ka qenë i lidhur më parë dhe që nuk është iniciuar nga OS, aplikohet i njëjti rrjet i tarifimit si për *lidhjen* origjinale. Megjithatë, në raste të tilla, në atë masë që disa elementë të lidhjes ekzistuese (të zhvendosura ose prishura) mund të ripërdoren pa cenuar sigurinë për qëllimin e *lidhjes* së re, këto kosto do të zbriten.

## **PJESA V: PRONËSIA E LIDHJES**

### **Neni 28.**

#### **Kufijtë e pronësisë**

Përveç rasteve kur është rënë dakord ndryshe në *marrëveshjen e lidhjes* midis OS dhe *aplikantit*, asetet e *lidhjes* pasi të jenë përfunduar, testuar dhe komisionuar dhe të jenë bërë operacionale nga *pika e lidhjes* e deri në *pikën e matjes*, përfshirë pajisjen matëse, do të jenë pronë e OS.

## **PJESA VI: DISPOZITA TË FUNDIT**

### **Neni 29.**

#### **Zgjidhja e mosmarrëveshjeve**

Çdo mosmarrëveshje që lind si rezultat i mos zbatimit të kësaj *Rregulloreje* do të trajtohet nga ERE në përputhje me "Rregulloren për trajtimin e ankesave të paraqitura nga klientët dhe zgjidhjen e mosmarrëveshjeve midis të licencuarve në sektorët e energjisë elektrike dhe gazit natyror".

### **Neni 30.**

#### **Hyrja në fuqi**

Kjo *Rregullore* hyn në fuqi pas ditës së botimit në Fletoren Zyrtare të Shqipërisë.

DRAFT-ERE